

# Derçûn ji desthelata manayê



**Hoşeng Şêx Mihemed**

## **Xwendinek bo binemayên giştî yên şîra devera Behdînan**

*Xwendevanên hêja.. Hevalên kovara Nûbûn, ji ber giringiya vê babetê li jêrê, me bi fer dît em weku goşeyekê û bi çend xelean ve li jêr navê "derçûn ji desthelata manay, xwendinek bo binemayên giştî yên şîra devera Behdînan" ji nivîsîna nivîserê jêhatî Hoşeng Şêx Mihemed, bi wê meremê ku mîfayekê giştî hebe û dîtî û boçûnên cuda cuda jî li ser bihêne wergirtin. Bi bihaneya hindê ku ev babetê li ser şîra devera Behdînan hatiye nivîsîn, zanînekê li ser pêzanînen xwendevanan zêde bike. Hûn û hizirmendiya Hoşeng Şêx Mihemed. **Nûbûn***

Gumanek bo te.

Xwendevanên hêja.

Xweşhalim ku şiyam evî berhemî bikime di destên te de ku berhemê mandîbûna çendîn şev û rojane, xweşhaliya min ji vê çendê dihê ku ez wek Hoşeng dişem binivîsim. Li ser babetek xweş pir biha ku şîre dinivîsim bi zarevek şirîn û pir xweş bo min

hatîne nivîsîn. Ev vekolîne, di vê xwendinê de min bi azadî kar kiriye, azad ji pîroziya şîrê û nivîsînê, azad ji nav û qebare, kêş û qelemê her kesekî. Azad ji şerm û neşermkirinê, hêvîdarim tu jî, azad vî berhemî bixwînî. Berî hemûyan, azad ji min, wek nivîser û diktatorek biçûk di vê xwendinê de.

Xwendevanê hêja, wê gavê ez hez ji te dikim, demê tu bişêyî min tîk bişkênî, xwendinek cuda û dij û dûr ji min di vî berhemî de berhem bînî, ez hez dikim tu nezanîna min di vî berhemî de diyar bikî û kêmasiyên hizirî, şîrî û rexneyî li cem min aşkira bikî.

Min divê xwendevanek bî, bişêy min biherfînî bi guman, pirsiyar û bersivên xwe yên taybet bi te û bi cîhanbîniya te ve.

Çunke berî te min wesa kiriye û min tuyê herfandî û herşandî, tu li cem min tijî guman û nihênî û pirsiyarî, hemîşe ez li te digirim û heta niho jî min çî nasname nedane te.

Bizanim tu dê çî bikî..?

### *Pişka yekem*

#### **Mana di navbera şîr û şairî de**

##### **Şîr**

Di vê derê de her pênasek bo şîrê, pênaseke dikeve bin desthelata manayekî yan çend manayan. Lê wek pêwîstiyek bo vê vekolînê ez neçarim pênasekî bidime şîrê, bi umêdê ew pênase bişê gelek rave û xwandinên cuda û cuda û hemereng û hevdij bibexşe xwandevanî.

Hêvîdarim jî kes bi vê pênasê nedaxbar be û ne wek pênasek yeqînî bixwîne, ev babete ezmûnek nûye û wek yekem ezmûn jî ez bi gumanek şîrî ne wek bi gumanek rexneyî dinivîsim, anku vê gavê bi tinê guman dibê raber bo vê xwandinê û çendî bişê pêkol dikim xwe ji desthelata bêsinora manayan derbaz bikim, bo wê ku şîr bişê bi xwe bibe desthelatek xweser û xwedan cîhana xwe ya taybet.

Bi guman ve dibijim: Şîr di vê gavê de ku ez tê de xwandina xwe dikim, renga ji heqîqetê nêzîktir be, heger nivîsînek be, ji bilî ku hunerî, hizirî û edebî ye, pitir jî ruhî be yan remzî be, yan rewankî be, serederiyeka rewankî li gel hemû babetan bike û pitir jî cexitê ji layena remzî û ruhiya diyarde û çemk û têgehiştinên hebûnê bike

û pitir jî kûrbûn be di ruha babet û peywendiya mirov, hebûnê, mirov û jiyanê. Û pitir wan cîhanbînî û jiyanbîniya pêşber bike ewên mirov neşê bi desthelata hizirî, edebî, felsefî, dînî, zanistî û beşên wan yên cuda cuda rave bike.

Anku şîr qesekirin be li ser rewana mirovî.. Remiz û hêm û amajên hebûna wî û peywendiyên wî li gel mirovan û ligel hebûnê. Eve heger bişêt?! Çunke bo vê çendê şîyan pêwîstin, di parçeyeka din de em dê behsî şîyanên şîrî dikin.

Şîr pêwîste çalakiyek cuda be ji çalakiyên din yên siyasî, felsefî, dînî, hiziriya mirovî, hem wek şêwe û hem wek naverok.

Pêwîste şîr nebe tiştek û babetek din, pêwîste vê çendê jî rohin bikim ku şîr ji babetên din kûrtir, zehmettir, geriyanek dûrtir û firehtir e.

Siyaset, dîn, felsefe, zanist, bi amîre û rêkên xwe yên taybet bi xwe ve, basê hebûnê dikin û bersivên xwe li hember hebûnê didene me, lê şîr, basê hebûna me nake, belkî hemîşe şîrê divêt bibite hebûnek taybet, bi rengê taybet bo me wê hebûnê rave bike ku cudaye ji raveyên din, renga piraniya raveyên dî.. Raveyên yeqînî û bê gumanin, lê ya şîrê raveyên gumankî û ne yeqînîne. Heger warên dî pitir bersiv bin bo pirsîyarên mirovan, eve şîr pitir pirsîyaran arastey mirovan dike û heger bersivê jî bide.. Eve bersivek tijî guman û pirsîyar dide.

Anku heger dîn û felsefe û siyaset û zanist bersivan li ser hebûna me bidene me. Eve şîr dihêt, gumana li ser wan bersivan dike û careka dî we li me dike em gumanê di rave û tefsîrên wan da bikîn û qan nebîn û bi bersivên wan razî nebîn, anku berdewam hêz û şîyanekê didete me bo lêgeriyan û keşîfkirineka zêdetir û kûrtir.. Ku kayeyên dî vî delîvey nadene me.

Heger warên dî komeka manayan bidene me, pêwîste şîr heman manayan nede me, pêwîste ew manayên ku felsefe, dîn, babetên dî neşên xwe jê xelas bikin, pêwîste şîr bikaribe xwe jê xelas bike, bi baweriya min şîrên azad û ne azad.. Nemir û mirar dê li vê derê jêkcuda dibin, renga ewên dişên xwe ji wan manayan xelas bikin bibine şîrên nemir û azad bibin ji her ravek mirov bo bike û berûvajî şîrên ne azad renga dîn, yan siyaset, yan zanist, yan felsefe dişê hemû manayên xwe lê bar bike û bike babetek ne şîrî.

Dîsan jî pêwîste bizanîn ku ruha şîrê ji wê derê çêdibe û ji dayik dibe demê manayên xwe yên taybet bi peyv û kerestên xwe çêdike û bi rêka zimanî dişê hebûnek taybet bi xwe ve biafrîne.

Şiîra azad, ew bi xwe, xwe diselmîne, ne wek siyaset, yan felsefe, yan dîn, yan her kayek ji bilî şîr bihê û îsbata hebûna wî bike, anku tişteke seyre demê kêfa me dihê ku şîrên me, wek parçeyeka felsefî, yan bi dîtinek siyasî, yan ravek dînî bihê xwandin, renga bo nivîseran xweş be demê berhemê wan yê şîrî bigehîne pila felsefê bo nimûne, renga ew nizanin ku cîhana şîrî ji cîhana felsefê cudaye, ciwantir, kûrtir, pir gumantir, firehtir, heqîqettir û estatîkîtire. Eve jî hem şair, hem rexnegir û xwandeveanên me dibe ber hindêk pirsan ku hejarî û nedariya wan nîşan dide li hember şîrê bi pile êk. Vêca li hember kayeyên dî bi pile dû, sêyem car jî peywendiya wan kayeyan bi hebûnê, peywendiya wan bi nivîsînê, bi mirovî û jiyanê.

Şîr bi xwe di nav xwe de hebûna xwe çêdike, hebûna xwe diselmîne, hebûneke ku renga siyaset, felsefe, dîn, zanist û raveyên cuda cuda bikêşe nav hebûna xwe û mirov jî tê de bibe cidîtîrîn ezmûn û li gor qanunên taybet bi şîrê careka dî mirov û hebûna mirovî dihê darêtin.

Renga piraniya kayeyên dî ji bilî şîrê neşên bi azadî basê hemû babetan bikin û li gelek erdan li hember hindêk pirsiyar, guman û ramanan xwe bêdeng bikin, yan bersivek yeqînî bibe rêgir li hember dûvçûna mirovî bo diyardeyên mirovayetî û hebûnê. Renga dîn mirovî li qonaxeka hizirikirinê birawestîne, renga siyaset gelek kot û peywendiya bo mirovî çêbike, renga felsefe bi hindêk raveyên lojîkî mirovî bihêle li biyabana pirsiyaran.. Lê şîr, nexêr hemû gavan bê sinor pirsiyaran çêdike û nabêje mirovî "bese, yan hiş be, yan qedexeye, yan xwe bêdeng bike, yan pirsiyar neke, yan guneye, herame, şerme htd."

Cîhana şîrê, cîhana mirovî ye bi hemû rehendan ve, cîhaneke ku şerm û bê şermî tê de dişên li hember yek wek yek pirsiyar bikin û dûvçûna li mirovî bikin, mirovî bibine qulaçkên tarî û nepenî, bêtî ku bibêjin eve diruste û eve nediruste.

Di şîrê de çi heqîqetên reha bo çemkên ciwanî û kirêtî, başî û xirabî, mirovperwerî û xiyane, rastî û direwê.. Û çemkên dî nînin.

Di heman dem de çi şair jî neşên direwan li şîrê bikin û berhemên neşîrî li ser milê şîrê bar bikin.